

寒
松
堂
集

五





寒松堂集

(五)

寒松堂集卷八

祭文 墓表 墓志 碑銘 行狀 紀略

歸省告祖塋文 丙申

象樞不肖。幸邀祖宗之世德。及吾父之庭訓。得以成科名。竊祿位。以有今日。伏念丙戌入仕以來。諸凡建功立言。繼志述事。足以顯揚家世者。今無一焉。象樞志大而才疎。多經而少權。固祖父所洞察也。惟恃此心。兢兢乎不敢欺朝廷。不敢辱祖父而已。顧十年之內。奉職而職未盡。得罪而罪已寬。被讒而讒不售。無一非聖主之仁明。其爲祖父默而祐之者實多也。若象樞有其欺與辱矣。是義之之所謂無尊。而趙括之僅能讀書也。祖父亦何利有此子孫。象樞亦何能逃祖父之鑒察而譴責耶。象樞久居京邸。僅從捧詔之便。取道蔚州。扶病一展墓下。其餘歲時。惟西望遙拜耳。霜露之感。其能已乎。頃因母病給假。奉旨歸省。於本月初六日。方抵里門。仰先靈之如在今。不可度思。念遊子之言歸兮。誓也何詞。悵陵谷之改變兮。展墓而視。告無愧於祖父兮。祖父其吐棄乎否也。

歸養告祖塋文 己亥

象樞聞先賢之訓矣。事親爲大。守身爲大。若象樞一身。歷十四年來。蓋爲君父之所有也。母氏不得而有

之以故升沈不敢計。毀譽不能辭。死生不及料。惟有懷懷清白。兢兢職分。冀得免於辱身及親而止。是象樞之所以仰承祖父世德者。祖父知之。無間人之知與不知也。自前歲拜墓而北。仍補原官。又經二載。幸聖主垂鑒。不加譴責。同列諸君。亦復有和衷共濟之雅。公退之餘。與志同道合者。究心聖學。互相砥礪。期於無忝所生。致身將在此日焉。獨念母氏在堂。春秋高矣。象樞委蛇君父。不能日侍母側。菽水湯藥。委之長兄象懸一人。於心何忍。昔人所謂報君之日長也。不得已有陳情一疏。六月得請。八月乃歸。抱兩子於膝。母心慰矣。祖父在天之靈。不更慰乎。況此身原爲君父之所有。而今得爲母氏有。象樞之守之者。益加力焉。辱身及親。庶幾免夫。若夫顯揚之業。耿耿在中。猶未敢告無罪於祖父之前也。雖春秋霜露。常埽墓前一片地。其如世德何哉。先靈鑒之。

鄉賢祠告祭文 丙申

吾父食俎豆之報。三年於茲矣。象樞不孝之罪。殆莫可指數也。前以尸素諫垣。竭蹶職業。不獲躬操牲醴。虔告几筵。旣而被謫補過。霜露屢更。獨賴長兄象懸。奉春秋祀。惟謹。此象樞所爲中夜徬徨而不能自安者也。憶癸未蓋棺之日。公論已屬。值甲申國變。事遂寢焉。今垂十年餘。而公論益著矣。搢紳鄰里。悉能表吾父之德。上下官長。復能褒吾父以言。獨象樞數年以來。在鄉在朝。無片善微勞。顯揚吾父之家世。繼述安在乎。此又象樞所爲中夜徬徨而不能自安者也。至吾父追蹤先哲。耐享千秋。且荷覃恩。贈徵仕郎。刑科左給事中之官。凡此皆朝廷之賜也。象樞分當捐糜以報之。顧乃心長力短。往往以愚狂之故。見容於

君父而取忌於僚友。未能仰副庭訓。慰吾父在天之靈。此又象樞所爲中夜徬徨而不能自安者也。茲因母病陳情。奉旨歸省。始得再入里門。瞻仰廟貌。猶歟休哉。自非吾父盛德。孰能當此乎。凡象樞所爲中夜徬徨而不能自安者。今爲稍釋矣。然不孝之罪。終莫可指數也。神其鑒之哉。

建祠告祖文庚子

象懸等生晚。不能見祖宗。奉菽水。屈指顯考見背之年。垂二十春秋矣。樹欲靜而風不休。子欲養而親不在。豈不慟哉。雖時享克修。焚香薦食。母氏之心少慰。竊念象樞忝職光祿。叨受恩封。一予省親。再予終養。而祀先之禮。獨缺焉不備。豈母氏之心哉。按會典所載品官祠堂之制甚詳。家禮云。君子將營宮室。先立祠堂於正寢之東。而今有其地矣。母氏十年所積之粟粒粒從勤儉中來。工師食之裕如也。象樞昔年捧詔至督。地方官長例有贈遺。致隆天使。故至今藏之用爲磚木灰石之需。而非不義之物也。象懸復畢力相助。不難刻日而成矣。擇於本月二十四日。鳩工集事。先是卜易得小過大象云。君子行過乎恭。喪過乎哀。用過乎儉。旨哉。此母氏之心。而卽祖宗之心。顯考之心也。敢不敬從。謹此預告。

豫告神主入祠文庚子

報本之心。人子皆有。家廟之典。品官獨隆。按會典所載。做宋儒祠堂之制。著爲令甲。炳如日星。我先世隱而不仕。時享於寢。於禮爲宜。至我顯考一命之初。年已遲暮。故有志而未逮。念象懸等少不更事。愧無敬承。今象樞既叨封典之榮。幸備京堂之末。因與象懸同心協力。營於南街新宅正寢之東。以終顯考之志。

以全母氏之孝。祠僅一間。龕分四架。椽桷安祔。庶乎粗完。藏書於左。則題曰存澤。課子於右。則題曰授經。若東曰滌器。以表蠲潔。西曰操臼。以習勤勞。且省牲有所。彰名分也。侑食有所。和神人也。至於齋戒有所。其心乃虔矣。沐浴有所。其體克修矣。在祖宗儉德相傳。粉飾固非所尙。惟朝廷恩典隆重。規模不可不崇。爰經始於五月廿四日。閱七十日而落成。筮得本月初六日。敬遷四代神主就祠安享。慟色養之不逮。喜俎豆而重新。始祖禮無龕架。而祀於前案。水源木本。誼不敢忘。百世不祧。竊有取焉。其叔祖禮當祔祭。謹附於高祖之龕。庶妣禮當易牲。謹附於前妣之龕。遠遵家禮。罔敢乖違。仰承先訓。罔敢隕越。神其垂鑒。屆期來臨。謹此豫告。

祠堂安主祭文 庚子

家祠初建。登豆方新。上合典禮。下竭子情。感激隆恩。曲體臣誼。追念盛德。詒厥孫子。木本水源。敢忘昭報。維我始祖。自雲遷蔚。成家創業。艱苦備嘗。傳至高祖。仁厚好施。岐黃濟世。鄉評推重。庶老高風。再傳曾祖。生有忍性。不躡公庭。勸息鼠牙。常解睚眦。置酒下拜。殆無虛日。人稱長者。奕世發祥。再傳祖考。商賈爲業。施捨爲心。葡子柿霜。濟人疾疾。傳至我考。仁孝性成。繼述光大。七歲哭恃。血染麻衣。恬靜寡言。受辱不報。策仕廉謹。囊無長物。憐孤恤寡。濟困扶危。內助賢淑。相與有成。從祀賢祠。光生俎豆。嗚呼。世代雖遙。豕聲不墜。善積於前。澤流於後。士勿廢讀。官勿貪賂。有一不肖。廟貌胡安。處家以和。居鄉以讓。有一不肖。几筵胡歆。存聖賢心。行仁義事。有一不肖。先靈胡妥。若子若孫。備物蠲吉。非有精誠。胡格祖考。母氏年高。親滌

釜鼎黍稷非馨。明德維馨。神其鑒茲。永勿吐棄。

祠堂告贈文甲辰

國家褒贈之典。原以教孝而作忠。臣子翟莒之榮。更宜因勸而知戒。總期受之者無愧。而守之者不辱也。維我祖宗家世積德。貽謨昌後。累傳而至。顯考顯前妣。續承先緒。垂訓義方。懿行夙著於鄉邦。壺儀素淑於宗黨。茲以象樞官贈如官。膺茲寵命。良無慚德。象樞祇申薦饗。少答劬勞。伏念象樞叨遇覃恩之日。則供職諫垣。以言事君之日也。前乎此者。果其無愧於覃恩也乎。榮矣。若存一非理非法之心。言一非理非法之言。而冒濫朝廷綸綍之休。雖施之而難爲受也。愧莫大焉。及今恭奉制書之日。則謝事光祿。以道養母之日也。後乎此者。果其不辱於制書也乎。榮矣。若存一非理非法之心。行一非理非法之事。而干犯朝廷追奪之令。雖予之而不克守也。辱莫大焉。愧而且辱。象樞之不肖何辭。徒具几筵。罔馨明德。顯考顯前妣靈爽在上。方指爲祖宗之罪人而吐之。以爲爲子而貽羞於國。貽累於家者戒。然而象樞有愧有辱與否。不敢自信也。惟我祖宗實降鑒焉。是日母李氏今封太孺人。扶杖率象樞妻李氏今封孺人。拜於祠下。伏望來格。

告安櫛文己酉

粵攷古禮。葬有棺槨。槨周於棺。此各槨一棺之制也。衛人之祔也。離之。魯人之祔也。合之。此雙棺一槨之制也。大凡喪葬稱家有無。昔處素士。非治槨時。今所處差異。始爲勅封太孺人顯妣李氏粗治一槨。奉有

遺命恭讓顯考。情理曲盡。敢不敬從。但恐前顯妣顯妣庶妣俱屬無柩。顯考念及賢淑。心或未安。若治四柩地狹難容。茲因開塋。並作大柩四棺。皆周。庶妣稍後尺餘。子心差可無憾。一措置間。未免驚動。謹此告知。又爲前顯妣暨庶妣補誌銘一石。以傳千秋。伏惟幽靈鑒之。宅兆永奠。存沒均安。尙鑒。

祭吳橫溪房師文 □年五月五日。夢師寃且死。越月。詢中州人果真。遂設位於庭。哭而祭之。

嗚呼痛哉。吾師乎。生爲豫中之人豪。死爲嵩下之厲魂。官則塞北之福曜。家則汝南之德門。倜儻其才兮。撫目十行而筆千言。顯燦其名兮。略形骸而卻籬樊。好爵不易縻兮。捧毛檄而悅乎高萱。佳士不易得兮。撫卞玉而題曰名璠。嗚呼痛哉。吾師乎。方其自號爲死人也。血與淚而常吞。迨其自額爲埋庵也。功與過而何存。僕婢無異乎人之僕婢。弟昆亦猶夫人之弟昆。儘流連於詩酒。任徜徉於邱園。詎擲揄於齧蘂。遂煨煉於覆盆。嗚呼痛哉。吾師乎。匪鼠投器。匪虱處褱。匪鳥擇木。匪羊觸藩。致身亡而家破。覺地慘而天昏。果干國法。而胡死之非國法。若拂輿論。而胡弔者在輿論。嗚呼痛哉。吾師乎。倜儻而情傷於放。顯燦而室忌其溫。孀閨蕭蕭兮。倏損西河之目。公門濟濟兮。誰叩北闕之關。嗚呼痛哉。吾師乎。珠墮深淵兮。蚌血無痕。蘭蕕當戶兮。晚草無根。棺浮淺土兮。狐影在垣。月照下泉兮。鬼哭如簪。今日數厄而人莫逃兮。黑獄沈冤。他年案雪而天有鑒兮。白骨銜恩。嗚呼痛哉。吾師乎。神來入夢。水去思源。千里之遠。几席之尊。蹇予小子。兮。歌易水之短筑。望廷尉之長旛。旣昧於河汾諡王通。甯取乎宋玉招屈原。

吾師番番元老休休个臣忠君愛國之誠出於天性尊賢下士之量冠於朝班詔繳弼違有宣公之論奏而不著其迹同心一德有召公之夾輔而不尸其功難進易退有留侯之知止而不高其名履泰居謙有潞公之大年而不變其節此皆所以見知於先帝見信於同朝見諒於天下之搢紳大夫以及兒童走卒而非門下士所敢稱述而悼惜者也象樞之所以稱述悼惜於吾師者惟在二十餘年淵源之本末而已吾師丙戌主會試考象樞成進士隨同榜謝恩畢踵門投一刺而吾師未識某某之面貌姓名籍貫也未幾考選庶常象樞濫竽其列吾師奉命送鼎甲暨庶吉士入翰林院讀書是日始得見吾師顏色而吾師仍未識某某之面貌姓名籍貫也既爲吾師衙門官朔望循例作閣揖外無私謁每元旦開印後及吾師誕日持刺拜賀閹者例辭不受帖迨至改授掖垣以迄洊歷光祿前後凡十四年槩如此順治十年內象樞忽遭妻非幾成冤獄午門外會審事屬子虛都人傳說會審時吾師剖悉情事舉朝洞然象樞於光天化日之下得以全名節而雪奇冤者賴先帝之聖明而滿漢諸君子之有公道也吾師之德安可忘哉然而以德報德中心藏之矣順治十六年象樞以母老蒙予終養時吾師久居林下象樞亦謝事將歸兩無嫌疑力疾一謁吾師乃延入園亭命之坐曰十餘年師弟今日纔見一面象樞起而謝曰吾師之恩象樞之罪也但吾師未受象樞一瓶酒象樞未領吾師一杯茶何獨於四百門弟子中知象樞之深耶吾師曰嘗在會議處見丈有直氣是我國家可用之人不欲他人誣害耳象樞不覺泫然涕下吾師亦含淚不言少頃曰太夫人年若何象樞曰七十一歲吾師曰年高正宜在膝下余亦老矣此後不知與丈再見一面

否。喫我一飯去。飯罷握手而別。業經八載。果不能再見吾師矣。嗚呼。慟哉。慟哉。憶象樞歸里之日。設闕位於存澤堂中。並置吾師生位於左。每朔望叩頭畢。卽拜吾師位前。如問起居。今年十月之朔。忽聞吾師訃音。遂抱生位於別室。哭而祭之。奈子幼不克往奠。遣僕魏居踞於門牆之外。以門下士代祭焉。吾師遺有諸世兄之賢。克世其家。且上而帝悼元輔。下而朝惜哲人。亦無需小子之生芻爲者。惟吾師夙許象樞有直氣。因直述二十餘年一面之古道。四百人中獨知之大德。以報吾師於地下。昔劉元城事司馬公。當其在朝。書問削迹。及其閒居。亟問無虛月。况與吾師生死隔世。何嫌何疑之有哉。願服心喪三年。勿削門人兩字。敢告靈爽。實式鑒之。

公祭張慧一貳尹暨孺人袁氏文

慧公慧公。爰勤事矣。許國謂何。臣心瘁矣。孺人孺人。爰盡節矣。殉夫謂何。婦道竭矣。嗚呼痛哉。昔日之去。兩車並御。今日之歸。雙轎同幃。嗚呼痛哉。彼邑之男。罷市而談。彼邑之女。停杵而語。嗚呼痛哉。蔚山蔚川。舉目黯然。蔚悲蔚歌。灑淚如沱。嗚呼痛哉。其爲子也。吾痛公孝。一理持身。古先是倣。一經承家。誦讀是樂。爲親守身。犯而不校。爲親保家。方而不撓。賢哉孺人。助公克效。其爲兄也。吾痛公義。家不析箸。財無私筭。食則同几。疾則夜視。田之紫荆。姜之大被。賢哉孺人。助公惟勸。其爲臣也。吾痛公忠。兢兢素志。蹇蹇匪躬。書生面目。清白家風。輸漕運餉。水盡山窮。事終海嶠。魂掩江楓。賢哉孺人。助公有功。其爲夫也。吾痛公正。琴瑟其情。蠶桂其性。有物有恆。維家之政。匪嗃匪嘻。如賓之敬。從一而終。夫子所命。賢哉孺人。助公以行。

嗚呼痛哉。一第之名。孰與平生。百年之修。孰與千秋。一節之揚。孰與五常。一身之捐。孰與兩全。嗚呼。蓋棺久矣。青史壽矣。德在口矣。誼在酒矣。靈維偶矣。歆我否矣。

公祭徐雲門貢士文

嗚呼。文章道義之交。生死存亡之際。士君子所爲惻焉心悼者也。若蔚代兩家之於雲老。則重有悼焉者。雲老才大而學博。安貧而樂道。有黃叔度林和靖遺風。其爲古文辭賦詩歌。則又元稹白居易之流也。又手刻燭。不足喻其敏妙。郊寒島瘦。未可倣其清高。以故蔚代間詩筒文緘。往來幾無虛日。而相成相規者。每每在語言文字之外。有精神氣味之投。故於蔚則嘗策蹇過從。雞黍是約。或升堂拜母。或促膝談心。或檢質疑問難之書。或商移風易俗之事。至今庸齋中杖屨宛然也。於代則嘗風雨聯牀。苜蓿爲歡。時而賦恆嶽之崔嵬。咏桑乾之沆瀣。時而追漢文之故址。弔蘇武之廢城。至今鐸署中翰墨依然也。而平城竟逝耶。且蔚於雲老交非一日。諸凡家世之譜牒。祖宗之祠祀。父母之喪葬。兒女之婚嫁。無不相聞。亦無不相信。前之陳情也。而雲老喜焉。後之奉召也。而雲老勉焉。是蔚之進退出處。亦惟雲老知之也。雲老蓋近於道者也。六經四子。研究已深。物理人情。體驗更熟。有道之氣。令人肅然起敬。而其虛懷善下。問道於蔚。則又抑然自處。謙讓弗遑也。昔安得不於雲老有深契。今安得不於雲老有深悼耶。回憶壬子春西洪話別時。意中頗有不能再見之感。惟有著書數卷。謂生平苦心具是焉。代州曾見而愛之。將欲剞劂以傳不朽。至秋攜稿北上。略加訂正。卽爲付梓。重詩文也。重人耳。甲寅冬。梓人告竣。歲杪寄平城。乃篝燈展帙。作而

言曰。是集也。代州之表章。和州之評定。非蔚州而青雲之幾。何不爲覆轂也。嗚呼。曾幾何時。而雲老竟逝耶。幸有子若孫。能讀父書。而且壽登大耋。全受全歸。猶見蔚代兩家冢子列賢書。以詩來賀。喜溢言表。其亦可以無憾耶。獨自此而風雅之道不復聞。規勉之言不復聽。老成持重之人不復親。則蔚代之不能無憾於雲老。可知矣。意者精氣所結。筆墨有靈。貫徹於蜚狐句注之遠。感通於飲食夢寐之微。彷彿若雲老之終老衡門。讀書學道而猶未逝也。是耶非耶。二月廿旬。都門聞訃。乃於署務繁冗中。搗管爲誄。灑淚致奠。深愧弗躬。靈其鑒之。來格斯筵。尙饗。

祭傅哲祥同知文

嗚呼。我公。固所稱愷悌君子也。亦限於數而溘焉長逝耶。夫數不能限公。有三焉。念公之生。則醫巫閭之間氣也。其出也。則值聖天子應運而從龍者也。其淵源也。則理學大儒凌川先生之遠派也。其育且教也。則太翁太母兩賢之玉於成也。天人協應。諒非偶然。其不能限公者一也。公自起家鉅鹿令。特舉卓異第一。未幾刺申國。守維揚。悉以寬平奏績。迨左遷金城。以至攝蔚篆。再攝渾源篆。尊賢下士。剔蠹恤商。撫百姓如嬰兒。仁心惠政。載在人口。其不能限公者二也。公事太母至孝。晨昏定省而外。每體慈德。不忍苛民。且手足骨肉之間。友愛備至。期於共爲君子。無貽堂上憂。及庭訓令子。惟以讀書明理爲業。又恐一日不近正人。聞正言。墜我忠孝家聲也。至性至情。太和元氣。其不能限公者三也。樞等知交有素。暨平日門下諸士。固信公深矣。卽所部之搢紳父老。以迄兒童走卒。無一不爲公信者。何竟限於數而溘焉長逝耶。嗚呼。

呼痛哉。樞尤有痛者。先是攝篆至蔚。甫下車。卽式閭見訪。首詢地方利弊。樞謝不敏。次以聖賢之學相質。樞肅然起敬。欲互相師友。相與有成。公益謙遜不遑。始知其志之不虛也。復推錫類之孝。升堂拜母。爲文祝先慈。八表壽。樞亦操拙筆。進太母觴。事竣歸金城。猶歲時通問安否。然未嘗一語及私也。去年先慈見背。公爲誄章哭之。今年春。擢恆郡貳守去。留詩別樞於苦次。有垂橐此行仍阜蓋。舞斑還得侍兕觥之句。蓋公不以遷秩爲喜。惟以道里甚近。得以迎養慈親。菽水歡聚。宦橐蕭然。亦可樂也。無何蒞任三月。竟限於數而溘焉長逝耶。嗚呼痛哉。樞聞訃之日。懸贈詩於益友堂中。讀其詩如見其人。淚從喉間出。幾不成聲。天乎。天乎。爲之奈何。惟願自今以往。令弟體兄之心。善事慈闈。順承儉德。令郎體父之心。敬守嚴訓。光大家門。庶可慰賢哲於地下。表清白於人間。樞依廬守制。纔過小祥。言不能文。莫寫哀悼。一詞一酌。具告几筵。靈其如在。來格斯虔。

祭徵君孫鍾元先生文

樞蓋慕先生之爲人。而始終神交者也。樞生也晚。竊幸於先生之生平。與先生之學問。得聞其梗槩。日以不獲親炙先生爲大憾。今則已矣。泰山梁木之悲。其將奈何耶。先生受天地中和之氣。接聖賢誠正之傳。氣節重於前朝。孝友著於北地。甘貧樂道。暢一生仁義之懷。致知力行。淑當世狂狷之士。吾國有顏子。諸大夫登之薦章。前身是靜修。先皇帝賁以徵聘。然而先生如祥麟威鳳之難爲致。斯繼往開來之有所歸。蘇門之巔。百泉之上。有大儒在焉。返諸聖經。直探窮神達化之本。參以儒說。不諱異端曲學之非。其立言

也。大而能平。其教人也。感而善入。故天下四方。率多有志於聖人之學。立雪者得意。聞風者傾心。先生猶謂理學之傳。代有所宗。集成全書。略破畛域。隨其資力。各見性情。天理人欲之途分。而上智下愚之志奮。俾前聖之絕學復續。聖朝之風教漸興。此先生所爲有體而有用也乎。憶樞未通聞問之先。則仰先生如山斗。旣奉教言以後。則依先生爲典型。故捧先生壽詠於先慈者。戊申歲也。拜先生哀誄於先慈者。己酉歲也。請先生指誨於馬君者。庚戌歲也。禱先生疾病於孔子者。辛亥歲也。約以乞骸之後。過訪夏峰。而先生卻寄詩喜樞入都者。壬子歲也。手題學宗人瑞四字爲先生九十壽者。癸丑歲也。正值今上崇儒重道之時。擬請存問耆碩。旦晚拜疏。忽因用兵而止者。甲寅歲也。嗚呼。好音頻寄。受益已多。先生孝友堂中。函丈宛然。樞竟無緣拜登耶。五世一堂。家庭間太和景象。樞竟無緣目覩耶。玉樹蘭芽。森森階下。樞僅見孝廉一孫。此後可能一一叩其家學。如對先生儀範耶。且先生髦而好學。誨人不倦。今年四月六日。劉子敷季自夏峰來傳先生語。謂此生不能見蔚州。又讀先生手書。策勉甚切。謂樞光彩已映於蘇門之山光水影。樞不敏。頻年廢學。德業罔進。方愧無以報先生。豈意先生遽爾辭世。留茲絕筆耶。倘樞同志有人。觀摩有日。不負先生臨終一言之期許。先生得無默爲啓誘耶。五月廿四日。旣設先生手蹟數紙於廳事。李子學誠哭奠矣。勉修蕪章。絮述本末。煩敢構斯馬君及孝廉代讀而告之。聊敘樞所以慕先生之爲人。而始終神交者有如此。嗚呼。人之相與。義取相成。哲人往矣。樞也虛生。遙申薄奠。言出涕橫。靈爽如在。鑒此微情。

祭內陸侍御王東臯同年文

嗚呼。世道之淳澆。人心之邪正。豈不繫乎人哉。夫既得人矣。足以振國家之紀綱。養天地之正氣。不曲學以阿世。不逢迎以事主。不苟且於功名之階。以滋海內隨波逐流之漸。當其生也。未嘗大展其所用。而齋志以沒。及沒之日。天下之人爭惜之。且歎息之。或流涕不能已者。必曰。國家之紀綱。既不得此人而振之。天地之正氣。復不得此人而養之。眞世道人心之不幸也。嗚呼。何竟亡我東臯公哉。公幼而敦重。舉止語默。卽如成人。下帷讀書。懷懷庭訓。時假蕭寺。蓬蒿蔽屣。斷齋啖茹。不易菜根風味。故與貧安之若素。迨舉於鄉。鄉之人以眞孝廉稱。丙戌捷南宮。以進士分校北闈。得人甚盛。初授行人。奉差東省。毫不與地方事。惟登泰山謁孔廟。卽歸矣。識者曰。異日居清華。必其嚴一介之操者也。後特擢吏曹。禁私謁。杜苞苴。外僚不能干以私。或議黜陟大事有不合者。輒力爭之。羣聲不能奪。寶坻杜冢宰。同眞定梁公大興。朱公特疏保薦清直。請留掌選者十年。廉名大著。朝論咸服。旣而受上知。拜官御史。諫書數上。其時有以賞卹進者。欲授正印。公白簡褫之。巡視京城。輯暴鋤奸。一時豪強斂迹。不敢怒馬輕裘。揚揚聯鑣於道上。公之丰采爲何如耶。公旣膺內擢。仍管道事。應差巡鹽。而極力辭之。兩監文武闥。風清弊絕。肅如也。公之廉介自持。始終不渝。又爲何如耶。天下之人。方望公一旦大用。以光明俊偉之概。爲國家振紀綱。以禮義廉恥之防。爲天地養正氣。今聞公沒。而自滿迄漢。自士大夫以至兒童走卒。識與不識。無不流涕嘆息。豈僅爲公一身生死惜哉。憶公以監禮南郊。歸而感病。臥牀。聞嚴父訃。卽扶病奔喪。哀毀不勝。抱病讀禮。旣除服。謂

公行且北上矣。豈意晨起遂肅衣端坐而逝耶。公伯仲五人而公居長。其諸兄弟之光大家門。亦未之或知。然皆卓然成立。亦可無手足憂。所痛心者。棄八十五歲之老母於北堂。反借棺以殮子。日夜撫子柩而哭之。此某之所爲流涕歎息。終疑廉吏可爲而不可爲也。將奈何耶。幸而有子承祧。異日克繼清白。以竟公未竟之業。天下之人。將拭目望之。又不獨我二三同譜。關切在懷矣。嗚呼。嶽嶽懷方。乾坤不易。生而正直。沒而神明。清剛之氣。凌於川嶽。太室峯嶽。洛水蕩漾。其人云亡。其道斯長。維靈不遠。來格來享。嗚呼。尙饗。

祭方伯畢亮四同年文

嗚呼。先生其逝耶。人之哭先生者。謂學貫天人。蔚然爲世儒宗。是三晉一大人物也。而執掌外吏。終不獲仰承顧問。先生以天下才。數歷中外。所至奏廉平第一。而不獲竟其施。先生德重於朝。功施於野。善溢於鄉。而不獲享期頤壽。以爲砥行修身者報。是皆足爲先生哭。嗚呼。先生塵視富貴。達觀死生。亦何一足介先生意。而所以哭先生者。以先生至性隱德。不欲人知。卓然爲邦國望。而今不可復見也。先生家故貧。早失怙恃。依大父鞠育。甫領解額。色養不逮。先生含痛終身。布衣舊食。歷官數十年。不乘輿。不衣帛。不一御梁肉。人詰其故。則嗚咽涕泗。悲不忍言。先生之孝何純也。先生起家學博。晉郎署。外歷諸監司。偉績彰彰。未嘗誤朝廷一事。而飲冰茹檠。未嘗取百姓一錢。甫擢楚右轄。聞彼處上官有陋例。卽引疾不履任。願甘罷職。策蹇歸里門。間關萬里。一僕隨之。尤古人不逮。家居時。累經薦舉。被徵召。復以老病不能應。意似理

亂勿與聞者。然平居指畫山川險隘。政務要領。地方利若弊。所當先後緩急。憂勤隱恤。惟寐始忘。一遇事則慷慨。壁畫義不引嫌。每娓娓數千言。爲國家綢繆未雨之患。又未嘗一日忘君父。先生之忠愛何摯也。先生以名進士位至方伯。亦尊矣榮矣。乃二十年閉戶蕭然。躬耕數頃。日與農夫牧豎飼牛羊。操畚插。爭勤惰於嚴寒溽暑之中。雖老無幾微倦色。先生之律已何高而苦也。先生窮經讀史。於古人書無不窺。下筆數千言不易稿。所著述等身。人叩之。沖如也。問所得。曰無有。而其與鄉人交。循循謙退。雖遇臧獲。不敢有傲容。人亦幾不知爲畢先生者。先生之接物。何謙和而下也。此皆先生之隱德。不欲人知。知之亦未更僕數。方諸古名臣隱君子。誰爲先生伯仲者。今天下乂安。聖天子敦崇耆舊。愛惜人才。使假先生以年。關西操守。范老甲兵。足以肩大任。決大疑。當與永寧于北溟。先生齊驅並駕。利濟生民。卽不出而讀書田畔。上下古今。與太原傅青主。同爲熙朝文獻。亦人瑞也。何竟奪我先生之速耶。嗚呼痛哉。朝之士大夫何所式。鄉縉紳誰復爲典型。當事之訪得失。禮於其廬者。奚所諮而處焉。父老疇與嬉遊。後生小子。將焉考德而問業。四方之聞其道勃然而慕者。烏乎景從。迴念同譜諸君子。落落晨星。又將安做而安仰也。嗚呼。筆至此而涕霑霑下矣。哀哉尙饗。

祭少參王近微同年文

吾丙戌一榜。登進士者四百人。斯時也。國運方開。人才蔚起。與一代從龍之彥。接踵聯輝。濟濟稱盛。在內則翰苑臺省。以至卿貳端揆。不乏也。在外則藩臬巡方。以至節鉞。不乏也。若先生者。具磊落英敏之才。負

光明俊偉之氣。虎頭燕頤。骨格異人。以之任大事。決大疑。建大議。經文緯武。出將入相。裕如也。雖敢以百里才目之。乃按序授官。予恩縣一令。時值地方初定。伏莽甚多。父老子弟。不得安耕鑿。上官且爲城池倉庫慮。先生笑曰。善牧馬者。去其害馬者而已。今寇在門庭而不除。如民牧何。遂親率健捕。躬擐甲冑。直入賊穴。擒渠散脇。如是者數。而積寇靖。四境安。然後善用撫摩。勸課農桑。三年報最。擢禮曹。凡定制求才諸事。無不實心擔當。往往名公巨卿及都人士見之曰。此明堂一柱也。尋分憲慶陽。其志甚壯。秦西之人。素聞先生名。望之如景星慶雲。獨是性慙直。不肯媚上官。履任年餘。堅以病辭。兩袖清風。飄然去矣。始也一縣令耳。有上馬擊賊。下馬草露布之略。而不獲大其用。究也一監司耳。有一介不與一介不取之意。而不獲竟其施。先生平生抱負。將自是遂已耶。墨莊一臥。不復作功名事業想。集詩萬首。寄託終身矣。有知先生者。累薦於朝。再蒙徵用。先生終不能就。而不意病果膏肓矣。嗚呼。先生甫遇花甲。何奪之速耶。哭先生者。咸謂先生才氣骨格。天壤所不多得。朝廷所不常有。是可悲也。而不知先生居鄉。德望更有堪爲矜式者。林下二十年。杜門不出。於地方官長。從不通一刺。先是典試山左。最號得人。後門下士。蕭公視學上谷。先生力卻謁見。成其大公。試畢。問寒溫一語足矣。師友高風。俱可千秋不朽。至里中少年。橫加欺侮。毀門庭之額。辱骨肉之親。似難忍矣。先生卒不與較。晚年涵養。智深勇沈。寢寢乎近於聖賢之自反者。有如此語云。雖無老成人。尙有典型。於今不可復見矣。第是年既哭吾畢公亮四。而先生又倏騎箕尾。一時恆山以北。太行以西。頓失兩大人。物爲年譜悲耶。爲桑梓悲耶。爲世道人心悲耶。不覺涕泗下而悲風起矣。先

生有靈。請鑒格焉。尙饗。

祭曹子步妹丈文

嗚呼慟哉。子步死耶。其定數耶。此固在天者也。余何敢言。第以其人言之。五十八歲而卽死。余之所不解者也。余自髫年。受完我夫子之託。與子步爲伴讀。及夫子棄世。又受兩師母之託。於子步爲授書。見子步孤苦零丁。受人欺侮。幾不能自存。所有先人貲產。爲貪官蠹役並豪強者。橫吞殆盡。幸其人僅存耳。子步始發憤入州庠。尋以本朝定鼎改武。署渾源守戎。未幾歸而耕薄田。營生計。粗有棲身餬口之業。然而慷慨之性。樂善之心。往往重義而輕財。扶危而濟困。凡人之死喪。患難。疾病。鬭爭。詞訟。婚娶諸事。或親或友。地不論遠近。時不論寒暑。偶有相聞。視如切己。區畫處置。廢寢忘餐。必至周旋曲當而後已。亦祇求不愧其爲人。未嘗居功也。至於余家。又屬至戚。上自父母。下至兒女之事。無非子步之真心熱腸情。至義盡者。且余之門戶。賴以看顧。節操賴以周全。肝膽賴以商榷。衰殘賴以體悉。而今俱不可得矣。慟哉。子步在幼年。則孤苦零丁之人也。其在中年。則慷慨樂善之人也。其在晚年。則真心熱腸情至義盡之人也。此人當死耶。不當死耶。慟哉。以子步之爲人。在家爲孝子。在國必爲忠臣。在鄉里爲長者。在海內必爲義士。此人當死耶。不當死耶。今竟死矣。此皆余之所不解者也。慟哉。夫復何言哉。獨余老矣。憶子步於己未之春。送余大兒入闈。又於庚申之秋。送次兒入京。見余年過六十。鬚鬢多霜。勸余加餐。復望余首邱。儻余犬馬力竭。謬蒙聖主鑒憐。俯允乞骸之請。生還故里。子步已先我而逝。余目中不見子步。何以爲情。卽今聞訃而

悼傷飲食頓減。又增一番老况。余所以深慟子步之爲人如此而竟死也。其竟死者定數也。其不當死者。子步之生平爲人也可奈何哉。京邸設位。兒女羣悲。大兒感切。躬奠總幃。兼慰吾妹。以安旅思。靈其不昧。來格來依。尙饗。

祭三妹張孺人文

嗚呼吾妹。何遽爾長逝耶。吾妹屬纊。在三月廿六。愚兄聞訃。在四月朔五。吾家兄弟姊妹僅四人。長兄大妹。得以執手而訣。愚兄獨於京邸設位而哭。既不能見吾妹之面。又不能撫吾妹之棺。嗚呼天乎。豈不慟哉。慟之極無暇爲誄矣。然亦不得不收淚捉筆。以寫愚兄身在宦途。手足傷殘之苦况。兼以述吾妹茹荼守節。女中丈夫之賢名。則愚兄之誄猶是淚也。吾妹賦性溫良。閨範嚴肅。自妹丈去世。所遺子女。尙未成立。吾妹以未亡人撫之教之。婚之嫁之。曰。吾異日乃可相見於地下也。其經理家務。則豐儉適宜。其待宗親族黨。則恩義兼盡。或有以壺內難處之事相商者。則又裁決明爽。不喃喃作兒女語。固婦人女子中所不多見者。懿行彰彰。指不勝屈。今壽未及耆。正宜享諸孤菽水之養。酬三十年擘畫之艱。儻有採風者舉以入告。表其貞節。夫亦可以無憾矣。吾妹何遽爾長逝耶。豈不慟哉。然尤有深慟者。愚兄生子最晚。己酉一子。聽星士家言。宜寄養於母之多子者。十二歲歸本家吉。因而此子累吾妹。神瘁心勞。不啻鞠育。計今十二年矣。尙不忍遽以歸之魏者。而倏焉遺之矣。愚兄將抱此子歸。不知吾妹九原之心。慰耶否耶。憶壬子歲。愚兄奉召入都時。灑淚而別。恐病軀未愈。不復見吾妹。幸而九年之間。勉支瘦骨。若從茲漸成衰朽。

不克勝重任。早晚蒙聖恩。放歸田里。兄弟姊妹。聚首興亭。以愚兄兩鬢霜雪。視吾妹纔頰白耳。夫何遽爾長逝耶。嗚呼。慟哉。慟哉。自去冬至今。不半年而哭吾女。又哭吾妹。此愚兄之所以傷心。而老景之所以不幸也。有數存焉。其奈何哉。茲遣誠兒親致誄詞。隨吾兄後。哭而奠之。靈其不昧。鑒吾遠悲。尙鑒。

祭二妹曹孺人文

嗚呼痛哉。余宦京邸者十年。而手足骨肉之間。傷殘殆盡矣。豈不悲哉。歲壬子。余奉召入都。親若友送別。殷殷。吾女拜吾膝。吾兩妹侍吾側。勸吾加餐。子步妹丈送吾至京師。凡長途之飲食起居。旅邸之米鹽薪水。皆躬爲經理。不假人手。閱數月乃歸。彼時余抱疴。吾妹及吾女皆無恙也。乃己未歲亡吾女。庚申亡吾三妹。今夏又亡吾子步妹丈。聞訃之後。悲慟傷心。淚不能止。回憶至戚中。當日慰余送余者。止存吾妹一人耳。勉抑哀衷。爲文一首。詩六章。哭之。不自知其言之長也。隨遣吾兒歸蔚。弔吾妹丈。兼慰吾妹。勸其節哀抱孫。以消晚年歲月。儻余他日乞骸而歸。見吾妹鬢髮蒼蒼。矍鑠而來。一敘十餘年手足闊別之情事。且悲且喜。卽如見吾妹丈及吾三妹與吾女也。嗚呼痛哉。何吾妹今又不存耶。吾妹年十一賦于歸。卽克盡婦道。營葬其祖若翁。拮据艱苦。鄉里欺侮之事。孀姑備嘗。彼時門祚衰薄。孝養不缺。且事死如生。歲時蘋蘩之薦。三十年如一日。吾妹之孝。可以感格天心也。吾妹丈讀書於外。吾妹獨理家務。佐膏火資。後因世出單丁。欲置側室。至於動色相勸。吾妹丈終不之從。而此意亦閨闔所僅見者矣。吾妹之德。可以挽回定數也。吾妹忠厚存心。勤儉御下。有人稍設雌黃者。必力斥之曰。勿傷厚道。若不聽。則遠去之。弗與言。而

且華鈿不事粗糲。自甘荆布之風。庶幾見之吾妹之懿行。可以享長年膺厚福也。何年甫週甲。頓棄人間。世耶。天道果不可問耶。意者吾妹丈於琴瑟之好。晚年更篤。家庭出入。相敬如賓。咸園亭花開果熟。必攜手同觀。相視而笑。彷彿鹿門遺意。今不忍中道乖離。竟相從於地下耶。不然。何天奪之速耶。獨是余兩鬢多霜。傷心疊見。三年內四動悲哀。一月中兩聞凶訃。老年何以堪此耶。至他日乞骸歸里之時。舉目淒淒。余又不知如何感悼矣。謹陳薄奠。用表遠忱。靈其有知。來享來格。尙饗。

祭夏師母牛氏文

樞喪母奄忽及禫。師母辭世。已九閱月於茲矣。痛哉。樞母逝而師母亦逝。慈訓淑型。相繼而隕。樞且抱憾終天。不能已。世兄其何以堪耶。竊念樞自髫年侍吾師門牆。躬承教澤。稔知師母閨範久矣。唱隨之際。相敬如賓。井臼之間。勤儉備至。止生一子。七齡就學。聰穎而敦重。識者以大器許之。未幾。吾師捐館舍。庭訓不終。師母堅守苦節。以慈代嚴。期玉於成。雖茹檠和熊。不是過也。世兄果蚤列州庠矣。尋拔國雍矣。尋又登北畿賢書矣。捷至。師母乃喜曰。我未亡人也。庶幾可以報夫子於地下。世兄捧賢書如捧檄。然祇願長侍慈闈膝下也。自是菽水承歡。樞亦邀恩歸養。樞母或過師母家。師母亦或過樞母家。相與話閭儀。說女工。論持家課子之心。商崇儉黜浮之道。家人聞之。莫不懷然。樞每於歲時伏臘。恭涓起居。見師母步履壯健。似中年人。從未見其扶杖也。樞私心竊幸曰。壽不可量矣。不幸樞母於己酉年見背去。師母固無恙也。乃世兄就銓。且曰。吾老矣。得見爾膺一命。吾心慰矣。世兄遂謁天官。筮仕南皮。令人曰。疲邑也。樞曰。不然。

皮距蔚不十舍。正好奉板輿。時世兄抱病。力疾就任。卽圖迎養。慮冬寒師母不能勝。卜在來春和煦時。執意冬杪一疾。竟不起。耶目中僅見膺一命。而不復沾綸綍之榮。豈非數耶。痛哉。世兄迎養未逮。湯藥未親。含殮未視。雖有諸孫。在其抱憾終天者。當何如也。樞旣痛樞母。又痛師母。兼痛世兄之無母。同於樞之無母。卽欲升堂一拜。而兩家慈闈寂然矣。痛哉。奈何。嘗讀仲由之言曰。昔由爲親百里負米。親沒。南遊於楚。從車百乘。累綯而坐。列鼎而食。欲負米百里。豈可得乎。樞與世兄均抱終天之憾。淚不能止矣。師母有靈。想亦墮淚。茲因世兄奔喪歸里。虞祭至三。門牆弟子。薄奠几筵。文耶情耶。酒耶淚耶。伏惟來格。

祭貞節妻母王氏文

痛哉痛哉。某無母矣。幸外母在。如吾母在焉。今外母亦棄而去耶。此樞之所以痛也。憶垂髫時。曾親見外父顏色。問病安否。外母引至榻前。令撫摩之。未幾。外父亡。遺二女俱屬弱齡。外母曲爲養育。誓不改節。俾二女嫁事。次第完成。外孫男女。幾如林立。樞自登第後。官京師者十餘年。每月則遣僕致詞。自己亥歸。養在里。歷十餘年。每朔望則躬詣堂前。親問起居。如家庭禮。蓋外母子視某。某卽母事外母也。樞母去世矣。外母目雖昏。固無恙耳。去年樞奉召入都時。跪外母牀下告別。外母潸然淚下曰。爾去可喜。吾老矣。不能再見爾矣。樞忍淚寬慰之。迨入都半年。聞外母病尋且瘳。逾半年又病。竟不起。此樞之所以痛也。外母平日每以外父缺嗣爲憾。今兩曾孫爲之承嗣。而外母含殮之夕。有姪並姪婦。有次婿次女。暨諸姪孫姪孫婦。外孫外孫婦。外孫女。俱環視之。以視他人生兒不立。或浪遊遠方。醫藥不謀。衣衾不備。有子而無子者。

爲何如也。况外母賦性溫良。治家勤儉。言笑不苟。壽登大耋。冰霜之操。達於彤庭。垂於棹楔。千萬禩爲之不朽。外母亦復何憾哉。樞所憾者。一官羈絆。不獲視含殮。護靈輜。惟有外母之長女。奔而送於墓門之間。俟封樹而返。樞聞訃之日。爲位於長安邸舍中。焚香設奠。率子媳而哭之。茲託長兄象懸代告几筵。又不獲躬致醑奠。此樞之所以痛也。靈其不昧。伏惟尙饗。

祭李孺人文

嗚呼。孺人其逝耶。何遽至此耶。以孺人之淑德。卽壽登期頤。坐堂上。受五世以下人稱觴進祝。容未有艾也。以孺人之淑德。卽眼見兒孫輩取科甲。綰墨綬。跪起牀下。次第問安。咸荷天子恩綸。各捧制書以進。容未有艾也。以孺人之淑德。漸以內則風鄉里。俾人知孝慈。家尙謙和。戶敦勤儉。富忘其富。貴忘其貴。凡閭內之執婦道者。咸奉之爲女師。容未有艾也。何遽至此耶。豈侍藥者愛護之至。小心之過耶。抑果數定。必不能違耶。嗚呼。復何言哉。憶昔先慈在世。孺人登堂拜祝。先慈去世。孺人撫棺悲痛。曾幾何時。玉步不復過寒家矣。昨歲六十九歲之辰。計及明歲古稀。畫堂開筵。兒孫舞綵。姻親族黨。無不歌詩而介壽者。某若服闋入都。恐不獲躬進一觴爲壽。此心歉然也。孰知某未入都而孺人辭世。某猶得伏地痛哭於寢門間耶。某入都後。遇有佳菓佳蔬。欲奉吾母一啖。不及矣。卽以奉吾母者。轉以奉孺人。佐令子菽水之歡。亦不及矣。豈不痛哉。豈不痛哉。茲於几筵前。酌酒陳詞。自愧弗躬。又冗筆不克表淑德。惟有遙拜致哀而已。靈如有知。伏惟鑒格。

祭解安人文

解魏兩家年譜世好三十年相與之雅同於骨肉安人所稔知也憶昔辛卯歲安人隨法周年兄自濟陽令內擢戶曹時尊姑郭太安人迎養在京先太孺人亦在京遇歲時伏臘往來過從共談內則井臼諸事兒媳輩側耳聽之几上僅餽核數器而已金珠之飾兩家槩未有也先太孺人數稱安人聰慧質樸幼從父授經書下筆數千言可立就卻無示及閩外者尋隨法周年兄赴池州太守任不幸值海逆猖獗奸人迎賊郡城內陷遂坐失守遣戍粵東安人從之越間關萬里險阻備嘗恬如也未幾會赦釋放安人育一女抱而歸以爲生還故鄉隨我法周兄守墳墓奉蒸嘗幸矣嗣是先太孺人去世聞安人每一念及未嘗不潸然泣數行下也今年四月終接法周年兄手書知有老蚌生珠之喜余京邸中兒女僕婢俱舉手加額以爲清白吏之報不意六月終安人訃至矣法周年兄亦附手書曰寒家失半壁天小兒女將何恃也嗚呼痛哉以安人孝而且賢於法周年兄有如賓之敬晚年琴瑟靜好既得手摩二子玉茁蘭芽又復躬受恩綸翟萼珈珮聊酬半生之艱苦胡乃天奪之速俾法周年兄鼓盆而歌撫絃而歎喜中生哀添鬢上霜雪幾何耶獨奈匏繫一官不能酌酒躬奠聊陳蕪詞以申情愴靈其有知鑒之格之

公祭烈女宋典姐文

爲臣死忠爲子死孝爲婦死節皆人倫之大風化之美也有一於此舉世稱奇若夫娟娟弱息伉儷未諧方在納采之年遂引于歸之義如宋女者尤奇中之奇古今所不多見者也宋女賦性堅貞言笑不苟生

長農戶。未覩詩書。媒氏合婚。羅帕成禮。蘭家負耒之子。卽爲宋女舉案之人。不意合卺未成。蘭子夭折。女聞訃而腸欲斷。母力勸而志彌堅。投繯未及結褵之期。至死不改從一之節。嗚呼烈哉。女出農家。一奇也。裂蘭姓。羅帕而縊。二奇也。氣絕後面目如生。三奇也。以鄉鄰之公舉。衛官之申報。廳道之查核。學使具疏上聞。奉命建坊旌其烈。紳士大夫。復爲詩歌以表章之。女其死而不死矣。理宜合葬。以慰幽魂。從此烈女冢間。木可連枝。瓜可並蒂。鳥可雙棲。不獨一方之景仰。實爲千萬人千萬世之景仰也。女其有靈。鑒茲公奠。

通議大夫福建督糧道參議前巡撫陝西兵部右侍郎兼都察院右副都御史伯珩張公墓表

余與陽城張公伯珩同舉於鄉。復同仕於朝。日以所學相砥礪。余先養母歸。閱八年。公卒於官。余在蔚聞訃。爲位而哭。誄以言者再。蓋爲吾道惜也。旣卜葬。其子茂生丐東谷先生誌且銘。走書屬余表其墓。余知公頗久。不忍辭。乃西望拜手而言曰。此墓也。是海內所稱清介君子。世祖嘉其實心任事。不愧風憲者也。公自起家縣令。歷侍御。擢亞卿。特改巡撫。以迄謫補少參。所部吏民將士。有一不德公者耶。卒之日。自朝至野。暨鄉里故老。有一不悼傷涕泣者耶。公之人品德業。表諸海內久矣。余胡表表者。躬行實踐之儒。而狂狷之流亞也。公爲人篤於孝。非法不言。非道不行。可謂孝矣。行孝先以忠。去其私。正其色。可謂忠矣。與人略短而取長。得人一善若己出。可謂恕矣。平生不立崖岸。不苟同流俗。不矜名飾節。以欺謾朋友。不爲急言遽色。以凌轢屬吏。事無巨細。求其心之所安而止。嘗自言人能於五倫中遭逆負屈。真心忍苦。不求

人知。卽此是陰德。又語余曰。願學孔子萬古不易家法。尋取所爲下學者。何在其正己而不求於人乎。又曰。顏子之屢空。武侯之淡泊。入道本領在此。公於躬行實踐。誠爲得力。若第謂才守過人而著書未聞也。豈知公之學者哉。公壬午列賢書。纔十八齡。余從八十人中竊窺之。凝重如山嶽。對同譜無一戲謔語。其居鄉也。聲色玩好了無所喜。邑俗故尙奢。公默寓維挽。懼墮先世淳樸意。雖官至中丞。僅置一區構家祠。爲蒸嘗地耳。余見世之爲大僚者。甫膺華臚。輒廣結納。競豪華。諸凡宮室。輿馬。僕從。優伶。田園器具。服飾。宴飲之類。無不侈然鳴得意。然而怨惡隨之。弗恤也。公有一焉否。且人有廉未必才。而有才或反以佐其不廉。卽廉矣才矣。又或一念一事之勉強。而非其心之所安也。視公之心爲何如耶。昔人有云。所不取也。可使貪者矜。而非彫斲以爲廉。所不爲也。可使弱者立。而非矯抗以爲勇。惟公有焉。嗚呼。儒術不明。一二講學之士。徒騰口說。觀其取舍。大抵時所好耳。違俗而適己。獨行而特立。如公者。乃可至於聖人之域。而無難憶。昔與余論學。有中行不可能。狂狷亦非易之語。蓋素心也。擬之以狂狷之流亞。匪敢抑公云。余不敏。謬辱公知。亦竊自附於知公。獨以不獲共學中行爲憾。安在公之朝聞而夕死。而余非罔生也。吾道其不幸矣夫。公諱璿。字伯珩。澤州之陽城人。若家世行實。生卒年月子女。已詳誌中。不復表。

承德郎進奉政大夫吏部考功司郎中玉筍馬公暨元配宜人吳氏墓表

嗚呼。是爲吏部考功郎中玉筍馬公暨元配吳宜人之墓。公醇儒也。與余稱道義交者垂二十年。每以聖學相期許。其反躬實踐。余往往愧弗逮。公與余同有母。公先蒙世祖章皇帝允侍養。余繼得請。閱十年。遭

先太孺人喪。除服未月而公卒。壬子元日。余聞訃痛悼。伏地不能起。竊念慈闈之養未終。君父之恩未報。吾道又何不幸也。時諸孤走使具狀。乞余表墓道。以垂不朽。余遽無以應。稍定。發哀函曰。先君未葬。恐傷祖母心。卜吉春二月。啓先慈吳安人壙。舉合葬禮。隧中誌銘。孫徵君先生許之矣。及讀徵君先生書。又以墓表文屬余。謂余不忍不一言也。余不敏。卽有言亦何能不朽公哉。第略舉生平。表其聞見最眞者。爲後世觀感云。公諱光裕。字繩貽。號玉筍。別號止齋。先世由曲沃徙安邑。自始祖以下傳七世。皆有隱德。曾祖崇。博雅君子也。從學之士五經咸備。崇生斯才。以春秋登萬歷乙酉賢書。宰尉氏有聲。是爲公大父。斯才生之偉。積學弗顯。學者稱爲高隱先生。皇清覃恩。贈承德郎。進奉政大夫。元配張太宜人。生丈夫子二。長卽公。幼服庭訓。卓然有遠大之志。稍長。益肆力於學。凡高隱公所藏書。悉搜覽無遺。與堂兄闡如。弟玉霽。交相砥礪。一門儼如師友。爲文以理學爲宗。不屑屑逢時技。年十七。爲諸生。尋食餼。遭高隱公之變。哀毀骨立。祭葬悉準古禮。乙酉。登鄉薦。與尉氏公科目次第皆相符。人咸謂馬氏世有積德云。丁亥。舉進士。戊子。授工部都水司主事。己丑。上命管理衛河。公遣役迎太宜人與吳安人至任所。隨躬歷河干。率所屬郡廳。力督疏濬。奉清慎勤三字爲官箴。夙弊悉除去。於河有圖有說。務殫心力。不敢怠職業。退食有暇。晷自念平日私淑鄉先達曹眞予先生。未窺精妙。時容城孫徵君爲一代理學宗。隱居蘇門。公日造大賢之廬。究心濂洛關閩之學。篤志躬行。不敢不勉。道岸斯登矣。閱兩朞。吳安人忽遘疾不起。公悲歎曰。吾門內失良友。奈何。吳安人爲邑望族。吳五桂之孫女。性端莊。識大體。治家勤儉。以孝敬事舅姑。與公相敬如賓。

助公爲孝子爲廉吏爲理學醇儒者。安人之力居多也。壬辰冬。差滿報命。假道過里門。爲吳安人畢葬事。繼娶劉宜人。隨赴京供職。轉銓曹。由文選主事陞考功副郎。晉稽勳。歷驗封。至考功郎。凡五遷。迎太宜人奉祿養。俱不就。命來使報云。常學吾邑劉吏部清正。勿以我爲念。公益勤於官。兢兢飲冰白惕。留心銓務。力扶公道。余待罪都門。與公爲比鄰。雖瓜李引嫌。頗悉公舉動。會推大臣。則侃侃持正。昌言於朝。考功日議天下功罪。不下數十件。悉以平心處之。一一奉王法天理而行。甲午春。題庭聯。有事必告天。心惟向日。二語。稽勳號寡事。公檢架上遺編。輯日抄二卷。宛對典型。又思天下大勢。第一在培養元氣。因草晉民三大苦一疏。以無言責。不果封進。遇地方大吏之任。探及地方利弊。卽詳言之。次第入告。得嘉納。再陟功司。兩經考核督撫。矢公矢慎。無不仰副上意。丙申正月。掌計典。竭七晝夜心力。詳核再四。不徇私。不枉法。逐人逐事。剖斷明確。然後登冊。復錄實蹟一冊自隨。同事初以爲煩。及上問降級多寡之故。公據所錄起草。一夕疏成。諸公咸駭神奇。讀公先期告神文。蓋懍懍乎趙清獻之復作也。在部兩奉嚴旨。皆出意外。公凝神定慮。惟以義命自安。時玉霽以乙未進士受職之任。公訓誠慰懇。復命余贈言策勉。玉於成。公將母之念愈切矣。曰。古人不以三公易一日之養。况吾弟遠離膝下哉。遂亟以終養請。上報可。一時公卿祖餞。賦詩贈別。皆曰。馬先生純孝人也。及抵舍日。依太宜人左右。居必致敬。養必致樂。凡可以悅親心者。無不曲盡。太宜人偶違和。爲文祈於神。願以身代。不數日大愈。會營宅先立祠堂。四仲致祭。必豐必潔。曰。吾身所享受。皆先人貽澤也。願子孫世世勿忘。因稟太宜人慈教。著家鐸四則。首孝弟。次和敬。次勤儉。次寬忍。遂

款作歌。明白易曉。遇朔望講解。家人悉敬聽焉。居恆不問戶外事。間視之餘。建育德書院。日課諸子。其中曰。望汝等爲眞人品。眞學問。慎勿墮我家聲也。又誡之曰。天地惟無物不有。無物不容。所以成其大。若有一計較。便生間隔。與天地生物之心。便不相似。諸子拜受教。公處袒免而下。至於里閭。全以至誠惻怛之意。相爲流通。任物情之或喜或怒。或德或怨。求慊於心足矣。總不以介意。卽有犯者。亦不較。嘗布感應篇三萬卷。廣示從善之樂。曰。善人人可爲。聖人人可至。只一念悚惕。便是人定勝天。公一生學力。都在人倫日用處。切實體認。以主敬爲把柄。以躬行實踐爲工夫。坦率謙謹。中有確乎不拔之操。有廓然大公之度。隨時隨處。檢身常若不及。近年尤專力於自反。曾寄余書曰。邇來毫無善行足述。只事事反求諸己。不敢謂己是不敢謂人非。因病求藥。大君子宜有以教我。余敬讀茲語。益服公五十知非之學焉。宜乎徵君先生二十年道義關切。無異余之與公也。先是公每遇生辰。不受客賀。遇太宜人誕日。則舉觴盡歡。去秋已得疾。爲太宜人壽。猶作嬰兒狀。寢疾三月。扶掖間起居不少懈。彌留之際。猶惓念孝養未終。潸然泣下也。孝子之心。其曾氏之啓手足乎。諸如敬族親。恤孀孤。佐鄉約。以挽頽風。立文社。以崇實學。與閭邑議建學宮之尊經閣。與友人馬子補正先賢先儒之名號位次。芳規美蹟。昭然在人耳目間。彼世之讀聖賢書。溺於紛華嗜慾。惑於異端虛無者。無論矣。有能如公之孝友天至。謙謹性成。不以不義之物奉親。不以非道之行辱親。生辰不受賀。母誕則舉觴歡宴。抱病猶不欲親知。至扶掖問安。死而後已者。幾人乎。有能如公之位列銓曹。飲冰誓神。矢公矢慎。一一奉王法天理而行者。幾人乎。有能如公之力肩聖道。就正大賢實

踐躬行。反求諸己。不外人倫。日用以爲學者。幾人乎。嗚呼。公往矣。公以一身承先啓後。積厚流光。子孫日蕃盛。科第日聯翩。其所以不朽公者。將有在乎。嗚呼。公往矣。後之人望鬱鬱松楸。撫豐碑而讀遺文。寧無觀感而興起者乎。此余表公之意也。夫公所著有止齋集。庭訓錄若干卷。若公與吳安人生卒年月日。世系子女。及吳安人懿行。俱詳載各誌銘。不復表。

徵君孫鍾元先生墓表

康熙十有四年四月二十一日。徵君前明舉人孫鍾元先生卒。其年冬十月。葬於輝縣夏峰之東原。又八年。蔚州魏象樞表其墓曰。先生諱奇逢。字啓泰。鍾元其號。保定之容城人。大父臣嘉靖辛酉鄉薦。歷官河東鹽運司運判。父丕振。邑諸生。先生年十七。舉萬歷庚子科鄉試。與定興鹿忠節公善。繼爲友。以聖賢相期勉。忠節家江村。先生家北城。相去十里。雖風雪暑雨。過從無虛日。討論濂洛之旨。而證諸六經。發爲文章。皆自抒心得。不屑屑訓詁詞章也。性至孝。連丁父母憂。哀毀成疾。喪葬一準古禮。偕兄弟結廬墓次者六年。巡按御史以聞。下詔旌焉。家故貧。饔飧常不給。有巨室以金粟餽者。婉卻之。一日與鹿公講學。自辰至日昃。蒼頭始持豆麵作羹以進。怡然無不足之色。嘗言從憂患抑鬱中。默識心性原本。生平學問。實得力於此。天啓末。魏忠賢竊柄。荼毒正人。左忠毅光斗。魏忠節大中。周忠介順昌。先後被逮。三君皆與鹿公爲友。於先生有國士之知。時鹿公贊高陽孫文正公軍於榆關。先生遣弟奇逢上書高陽曰。左魏諸君。善類之宗。直臣之首。橫被奇冤。有心者孰不扼腕。昔盧次樞一莽男子耳。謝茂秦以布衣爲行。哭於燕市曰。

諸君今不爲盧生地。乃從千載下哀湘而弔賈乎。李獻吉在獄。何中默致書楊文襄。求一援手。康德涵至。不自愛其名。左魏之品。可方獻吉。非次梗所敢望。某一介書生。無由哭訴。尙慙茂秦。閣下名位。比肩文襄。豈至出德涵下乎。高陽覽書。卽具疏請入朝。面陳軍事。將爲諸公申救。忠賢聞之。謂高陽與晉陽之甲夜。遶御牀而泣。乃馳詔止之。時左誣賊二萬。魏周皆數千。嚴期追比。三君子皆清白吏。無以應。而忠毅舊爲三輔屯田使。有遺愛。又嘗督學畿內。門下士甚衆。先生與鹿太公及其友張果中。倡義獨助。輸者雲集。甫就而三君子相繼拷死。則又經紀其喪。餘則按籍俵散。當是時。邇校嚴急。士大夫觸手糜爛。親戚故交。鍵戶謝絕。先生慷慨急難。呼號同志。禍福不足動心。而禍亦卒不及也。高陽知其有經世才。將題授職方郎。與共事。先生知時不可爲。自陳願老公車。不敢借途求用。臺諫交章推舉。堅辭不就。崇禎丙子。容城被圍。士垣將圯。率宗族閭黨。矢志守禦。城賴以完。巡撫都御史上其事。特詔褒嘉。南兵部尙書范公景文。聘贊畫軍務。亦辭不赴。時秦晉已陷。寇氛漸逼都城。攜家入易之五公山。結茅雙峰。嫺黨門人。依以自保者數百家。飭武備。定條約。暇則講詩習禮。修冠婚喪祭儀節。簡而可行。干戈搶攘之際。絃歌俎豆。遠近服其德教。賊盜聞而屏迹。時以方田子春無終山焉。國朝順治初。祭酒薛公所蘊。具疏讓官。兵部左侍郎劉公餘祐。及巡按御史薦剡上。先生堅臥不應。蘇門爲康節魯齋讀書之地。泉石幽勝。遂移家築堂。名曰兼山。讀易其中。子孫耕稼自給。門人負笈來者日衆。先生涵養日邃。每晨起。謁先祠畢。澄心端坐。雖疾病未嘗見惰容。接人無貴賤少長。必以誠。有請問者。隨其淺深。傾懷告之。無不人人自得。子孫甥壻數十人。進退揖

讓皆有成法。卽耕夫牧豎亦知尊敬。時節花放。鄰村爭置酒相邀。兒童皆歡喜相就曰。我先生也。年九十。二卒士大夫弔哭。屬路不絕。市者罷。耕者廢耒。督學使檄郡邑列祀百泉書院。容城夏峰皆立專祠祀之。先生著書甚富。理學宗傳表周元公以下爲十一子。別爲諸儒考附之。蓋出獨見。非依傍舊聞者。其學主於慎獨。而於人倫日用體認天理。嘗曰。喜怒哀樂中節。視聽言動合禮。子臣弟友盡分。此終身行不盡者。自言平生年愈進。功愈密。天理二字。是千聖心傳。非語言文字可以承當。世之學者。不務躬行。惟騰口說。徒增藩籬。於道無補。體先生之言。可以自悟矣。余昔奉母里居。無由親炙。與聞緒論。間嘗馳書請質所疑。荷先生手教還答。千里如侍几席。今典型旣邈。後進誰宗。因其孫壬戌進士淦之請。謹書其大者如此。過其墓者。低徊俯仰。當有慨然興起不能自己者。則先生之風教愈遠而彌新也。其子孫名次列在志銘者不具述。

文林郎清源縣知縣儲公遯庵墓誌銘

康熙丙午丁未間。人文焜耀。宜興三儲配三蘇。讀其文。其一蒼蒼堅緻。類有節。一英華美秀而有度。一倜儻幻化。義不與今古人苟合。有骨。觀乎人文以化成天下。此其驗也。壬子歲。余奉召入朝。詢三儲官。一選木天。其二則皆百里選也。乙卯。大兒學誠舉於鄉。出孫太原儲清源兩公門。儲公者。正余曩讀其文。謂義不與今古人苟合。當世所稱廣期先生者也。歲時廉其治狀有聲。戊午。上詔舉天下博學宏辭之士。董學士訥疏清源知縣儲方慶。人文稱報可。將入都。清民攀轅環泣。不忍慈母去。比至都下。待試十閱月。瀟然

著書足不過公卿門。試不中。清源復以竹馬來。時抱病絕意仕進。竟歸里自號遯庵。爲兒時家門鼎盛。其祖太學公承御史公後。頗豪華。蓄女樂二部。堂中匏竹絲管。歌舞之聲不絕。母家潘氏。饒甲與邑。父太學君奇愛遯庵。外內戚屬。爭致煩豔。娛悅耳目。遯庵概棄不視。獨愛書。七歲五經成誦。八歲抱至督學前。與試。號奇童。十六試棘闈。不中。屢試屢蹢。中更父若母大喪。家迺中落。遯庵益肆其志於文章。三十四舉江南榜第一。其難兄井陘公善慶。堂姪庶子公振。俱大魁。名益盛。震動一時。遯庵殿試直言時政。比諸封事。得二甲。不與館選。遂家居奉祖如父。七年。令清源西南方用兵。清爲孔道。邑小。牛馬芻秣。供億日增。數從上官爲小民請命。力言費煩重。作法派民。軍行不數年而民盡矣。上官意不許。遯庵憤激。舉債補濟。歲終銷算。亦不許。乃力任不派里甲絲毫。士民咸德之。獨不獲意於上官。坐不能去。又不許。是時善慶令井陘。與清源遙望五百里。軍興震盪。旁午飛馳之聲相應。日或踣數馬。所過誅責不如意。杖馬箠指長吏。難以怒詈。井陘君不勝憤。自經署中。風聞遯庵哭累日夜不能止。引疾乞休。曰。職與亡兄生同胞。幼同學。稍長同失父母。起居飲食。倚祖爲命。及成名卜仕。無不同者。兄困於王事。死非命。不才骨與俱碎。有祖九十有五。不能當悲哀。乞題放還。保祖命。左右聞者皆泣。當事不爲動。踰年。其祖太學公果告終。遯庵求去益力。上官留益堅。病甚。會徵車就道事畢。余始相識。知其義命自安。不復作金門想。遯豈待卜哉。旣歸。葬祖成禮。撫荒田。敝廬甚適。埽榻讀古人書。課子姪爲文章。門無雜賓。慶弔宴會不相聞。非骨肉戚屬。與素所交遊。雖至不見。後亦罕至。遯庵又嘗自愧不及古人。獨一見與余合。遯庵才名初盛。余在家。及余在國。遯庵

復去官。余爲詩送之。有人從玉署瞻龍袞。君合銅章讓布衣之句。慙意存焉爾。慙庵爲人。天性耿介。扶弱抑強。不慕勢利。才幹骨力。養晦數年。可任天下事。乃五十而夢登天。悲哉。慙庵家世。起唐御史儲光義公。以事長卜江南。後裔止宜興。爲臧林儲氏。累世簪纓不少。入明宗祀益繁衍。曾祖御史公昌祚。起萬歷名進士。傷於讒。終蜀兵備。督階中憲大夫。祖懋端。太學生。父福疇。中壬午副榜。貢太學。有文名。贈文林郎清源縣知縣。母潘氏。明己丑進士戶部郎中諱守正公孫女。州二尹諱紹謨公女。贈太孺人。生四子。公其三也。公諱方慶。字廣期。號慙庵。康熙丙午解元。丁未進士。授山西清源縣知縣。生於癸酉三月初五日辰時。卒於康熙癸亥三月二十九日辰時。享年五十有一。配某氏。子五人。長右文。中康熙丁巳科順天舉人。娶莫氏。辛丑進士。現任刑科給事中。諱大勳公女。次大文。邑庠生。娶董氏。現任陝西漢中府知府。諱遂昇公女。次在文。郡庠生。未聘。次郁文。未聘。次雄文。聘蔣氏。乙未進士。候補少參諱龍光公女。女四人。長適王沂。遇。次適太學生瞿天奇。次適太學生潘本仁。己丑進士。長蘆分司諱瀛選公冢孫。現任胡廣淑浦縣知縣。諱眉公長子。次許字郡庠生。周百藥。庚辰進士。禮科給事中。諱正儒公子。慙庵門下士。牛兆捷。善師。慙庵聞變。有望祭文詞甚哀。亦傷慙庵長於特立。沮於孤行也。余兒學誠哭以詩。有空將詞賦傳華國。不使才猷說濟川之句。其實錄哉。所著文集二百篇。詩各體共千首。嗣刻行世。爰系以銘。

銘曰。景星慶雲。天之瑞也。文則有神。君慈母人之善也。官則守玉輝於山。珠媚於淵。而弗耀於市。物何咎。午未義興。號才藪。朝華夕謝。難爲久。鬱彼佳城。深且厚。登高望遠。期不朽。

徐母顧太夫人神道碑

國家丕基肇造。敦龐淳淑之氣。蔚爲人文。必有偉人碩彥。應運興起。閱學名德。萃於一門。如古之元凱其人者。古今史氏所記不多見。蓋以卜天地毓瑞之徵。祖宗養賢之報也。崑山徐氏健庵名乾學。果亭名秉義。立齋名元文。兄弟先後擢大魁。官侍從。立齋且侍講幄。備聖主顧問。竚望金甌矣。搢紳先生。嘖嘖稱科名盛事。然君子則以爲芝草有本。醴泉有源。徐氏之賢。非獨子德茂也。蓋實有義方之訓焉。尤數數聞之吳中長老云。丙辰冬。聞太夫人訃。健庵立齋哀毀骨立。幾不欲生。自都下奔喪。素車白馬。長號而歸。果亭時請假在籍。卜葬有日。介余友葉訢庵學士屬余撰墓碑文。余竊自念。先慈見背後。母儀雖存。弗克躬踐。追詳讀行狀。輒俯首至地。拜徐母之訓。猶吾母也。曷忍辭。按狀。母顧姓。自高祖至祖。皆進士。累世爲顯官。父賓瑤公諱同應。官廩生。清修篤志。品重東南。母何夫人。博學明禮。幼卽訓以烈女傳。孝經諸書。太夫人四歲。卽能誦唐詩。屬對。女工組紃。精敏過人。穎慧性成也。十五歸贈侍郎公。操家政者四十六年。事王母相夫子。教後人。爲徐氏孝子賢婦嚴師。其懿節高行。志銘詳哉言之。謹述其槩。太夫人之智仁恭儉。數大端。可爲百世儀型者。太夫人識見遠大。每論古今及當世事。幾侃然言之。洞中竅要。贈公讀書好古。不爲酷吏所善。以危法中之幾不測。太夫人心力交瘁。營救解免。得明哲之義。贈公遊學閩越及鄰郡。一切徭賦逋責。叢委填萃。太夫人綜理酬諾。悉無後時。贈公得專意四方。交無顧慮。賴太夫人智也。課健庵兄弟。尤謹嚴。所讀書背誦覆校。問大義。夜分必察其讀何書。何所語。俾贈公之誨益勤不懈。丙午經營贈公大

事折衷古禮。哀悼况瘁。無遺憾。維太夫人仁也。先姑沒三十餘年。享祀家廟。埽祭邱隴。專一無怠。至立齋。擢狀元。太夫人曰。此祖宗所貽。爾父所教也。健庵果亭相繼及第。貽書京邸。深以盛滿爲戒。臨深履冰。無替吾訓。撫庶出子亮采。不異所生。師誨嫺聘。恩意周厚。居家不御綺縠。不設盛饌。不多婢妾。賑貧周乏。咨嗟太息。營救乃已。從母之女。具裝資嫁。好施予。樂善終身不倦。其恭儉類如此。蓋太夫人性無他好。家政之暇。旁覽古蹟。稱述古人善言善事。啓誘諸子。期以勿忘先德。勿忘隱約。勿忘患難。以文章起家。以道義治身。以端人正士爲友生。以公忠清介報天子。卽一門元凱。不是過也。益信太夫人之智仁恭儉。儀型百世矣。余不文。不能表章懿德。聊撫其實。用備異日太史之採云爾。太夫人享年六十有一。誥封太夫人。贈侍郎公先太夫人十一年卒。贈公懿行齒爵。別詳志乘。子四。長乾學。庚戌進士及第。右春坊右贊善兼翰林院檢討。次秉義。癸丑進士及第。翰林院編修。加一級。次元文。己丑進士及第。經筵日講起居注官。翰林院掌院學士兼禮部侍郎。加一級。教習庶吉士。次亮采。監生。女二。孫男六。孫女五。其聘娶姻婭。太夫人生卒年月。詳載志表。不再述。爰系之銘。銘曰。

蔚州宋烈女石碣銘

懿彼女宗。嬪於東海。內則旣閑。母儀斯在一。經教子。勝金滿籬。三鳳鏘鏘。來儀闕庭。或長北扉。或參侍從。譬作明堂。汝惟梁棟。龍章象服。以答勞勩。華旒匪榮。德媿大家。賜阡鬱鬱。昆山之麓。億萬斯年。自求多福。

康熙四年正月二十三日。蔚州衛西崖頭烈女宋典姐死。死之日。年十七。父宋有懷。母裴氏。無子。典姐先

是許字州民蘭尙安子蘭州廝兩姓皆農以羅帕約爲婚未及娶蘭州廝暴亡其家距西崖頭二十里訃至女涕泣絕食乘間裂原聘羅帕自縊死嗚呼烈哉衛有司具事請旌表暫厝淺土五年十一月十二日督學使蕭公惟豫聞於上報可越歲丁未四月十六日蔚士民議遷典姐柩啓蘭州廝家合葬焉義士李雲華龔匠誌其墓舊史氏魏象樞爲之銘曰其心如結其碧爲血不爲劍合甯爲玉折生則異室死則同穴天子聞之書曰貞烈

刑部尙書謚端敏公愚劉公行狀

康熙十八年己未大司寇劉公公愚以致政卒於里報疏至上覽而悼之予祭葬如例謚曰端敏一時諸縉紳無不涕淚者余與公同庚同榜復前後同官尤有深痛云公子性哀毀骨立具行狀乞余狀詞甚哀志甚切也余素知公誼不容辭遂狀焉公諱樾字玉疊號公愚先世山左汶上人諱士元者遷順天府大城縣之趙扶村始爲直隸人六傳迺生北泉公臻臻生春湖公灝灝生蓼生公漢儒春湖蓼生兩公皆贈通奉大夫蓼生公以壬戌進士官至左副都御史直節有聲副都公娶贈夫人王氏生七子公其次也公幼端靜不好嬉戲攻苦誦讀十六遊邑庠試輒冠軍十九廩餼己卯隨蓼生公遊粵中江海巉巖風波阻險未嘗以震驚淪所守趨庭服義方訓整如也由是聞見益廣殫承家學順治二年雋於鄉三年丙戌成進士世祖拔授戶科給事中丁亥轉吏兵二科左右給事中亮直多所建白如議緩征以甦災黎捐俸薪以拯流亡借牛種以業貧民迅督撫考核糾撫鎮扶同諸疏皆有關國計民生者垣中不受私謁不徇情

面清而不激。和而不同。其生平大節類如此。旋以言事落職。歸事蓼生公。王夫人愉愉色養者。又五年。順治癸巳。特詔起補兵垣。典試閩中。得士甚盛。今少宗伯富公鴻基。尤稱翹楚。世祖欲令廷臣練民事。遂外任山西河東副使。奉有才優經濟。堪任養民之旨。下車卽榜署聯曰。存心似水。執法如山。可謂有志矣。山盜竊發。單騎諭之散爲農。賣劍買牛。於今復見。其大者若稽兵餉侵扣之弊。清織匠包賠之累。察吏恤民。繕城諸治績。至今晉人能言之。巡方高公疏薦以聞。皆實政也。時蓼生公迎養官署。每退食必問所行某事。諄諄以忠廉爲誠。尋擢中州大參。治蹟無異在河東時。再擢楚臬。秉公持法。民以不冤。觀察之職。庶幾無忝於古云。及遷楚右轄。右轄稱閒署。以吏民相安爲善。舊例協黔餉。必經楚藩兌授。公倡議更例。令解官面付。不由司庫。省衙門胥役批掣時。日留難稱較輕重諸費。人咸頌之。時西山巨寇。三省夾勦。職饋運躬履行閒。晝夜不少懈。癸卯春。聞王夫人喪。哀毀泣血。撫軍爲具疏請守制。卽治院以軍事急。轉饋難無代公者。公設位朝夕哭。嘔血數升。以死乞歸。治院必不可。公墨衰從事。崎嶇山石草棘中。運夫皆感恩。信又覩公勞瘁狀。互相誠勉。輸芻糗無少缺。賊平始得還。伏地號呼曰。天乎。今日始得奔喪。真罪人矣。慟絕復甦。比歸讀禮鄉居。得侍蓼生公晨昏。菽水之餘。立義館義田。以待宗族之朴不能文。貧不能活者。踰兩年。蓼生公捐館舍。追念王夫人終天之痛。愈愼愈戚。遠近皆以孝稱。其於諸弟尤極友愛。居四弟以己宅移七弟以覃恩廕。撫六弟所遺幼子幼女。嫁娶以禮。如己出。痛五弟卒於官。經理喪事。俾孤姪扶櫬以歸。手足之誼又如此。服闋補江西布政使。時滇逆叛亂。措餉供兵。事辦而民不擾。王師從枕席上過。先是

憫江土瘠貧。申請激切。得免四州縣浮糧。且贖難民。招流民。禁差役追呼。郡邑尸祝者。如出一口。異聲達於朝。上召授太常寺卿。遷大理卿。不數月。遷左副都御史。隨具有請。蜀江民缺額之賦一疏。言江右當楚閩亂後。民逃田墟。錢糧缺額。不獨則逃者不歸。歸者復逃。荒者未墾。墾者仍荒。語甚懇切。上覽疏爲之惻然。下部議。未幾。奉特旨。盡行蠲免。以恤凋殘。江右之民。其有瘳乎。又陳勦楚賊機宜。言楚賊守長沙。止知大兵由江西道袁州。而不防袁州南由永新。不百餘里達茶陵。又三百里可取衡州。衡州下則長沙不能守。西北辰常。西南寶永。俱可傳檄定也。朝議韙之。舊以哀毀患左脇痞。丙辰秋。遂大作。又感溺血症。戊午秋。具疏乞骸。溫綸慰留。復遣醫診視。令加意調治。病中陞少宰。隨晉大司寇。甫奉命。余適詣楊前問病。公曰。治病與治刑。異乎否乎。余曰。醫者意也。當補而瀉。當瀉而補。失均也。刑者平也。失入而冤生者。與失出而冤死者。失均也。公聞而是之。己未春。病劇。再疏辭職。俞旨予致仕。歸里二十日。病且不起。呼諸子至前。囑曰。生老病死。時至。卽行。語云。生寄也。死歸也。獨君恩未報耳。索筆作遺疏。正衣冠卒。公賦性謹厚。與人無忤。閩里稱爲長者。且勇於道義。恬於仕進。讀書務見躬行。詩文不爲彫飾。尤善臨池。所著有雙鶴堂詩集。諫垣疏稿。按公出歷四省。所至必修學宮。建書院。講聖諭。以經術爲治術。善撫百姓。如家人婦子。待屬吏持大體。不爲苛察。卓乎經濟之才也。惜大業未終。不無遺憾焉。宜其臨別之日。執余手而長泣。謂吾兩人同受皇恩。乃不獲同報也。奈何。猶憶余同榜同庚者五人。若王東臬伯勉之清介。喬白山映伍之厚重。衛澹足貞之剛方。劉公愚樾之端亮。今皆化爲星辰矣。獨余以後死之身。碌碌無補。仰對聖君。俯思良友。

愧哉愧哉。公丁巳十一月二十五日生。康熙己未五月十三日卒。年六十有三。元配陳氏。封夫人。前乙卯。舉人。遵義府推官。國維女。妾南氏。宋氏。陳夫人生長子性。歲貢生。候選國子監學正。南氏生次子忬。庠生。三子悝。乃先生五弟。楷遺孤。撫爲子者。宋氏生四子懋。五子懋。陳夫人生一女。適太學生高恆升。一孫琬。性出一孫女。忬出。余拙於文詞。以俟椽筆銘公者。公且不朽矣。謹狀。

先妣李太孺人行狀

嗚呼痛哉。先孺人竟棄不孝象樞長逝矣。不孝象樞罪惡深重。夫復何言。自不孝象樞己亥夏六月邀恩歸養。閱十年所。先太孺人大病三次。垂危而安。藥力幾與飲食等。去歲戊申。壽躋八袞。親族進觴。鄉里稱慶。不孝象樞復丐名儒巨公之言。承歡膝下。一時家庭之閒。融融如也。曾幾何時。竟棄不孝象樞長逝矣。嗚呼慟哉。不孝象樞不德。不克一言一行之幾於道。以顯揚先太孺人。乃並先太孺人行實。泯泯無所述。述或失厥真。不孝象樞死且不足贖矣。飲泣苦塊。謀爲狀以告先生長者。長兄象懸淚淫淫。謝不敏。不孝象樞追憶懿行。儼然如昨。擗管荒迷。罔知措詞。問諸老友雲門徐子。徐子曰。太孺人內則表表。固鄉里所悉聞也。八袞乞言引。且達於國。盡取而狀焉。不孝象樞如夢乍醒。遂披淚檢小引。詮次爲狀。乞大君子哀而賜之誌與表。勒壙石以垂不朽。太孺人姓李氏。爲青州司李孝廉公諱祺重孫女。河內縣尉公諱登科女也。端恪寡言笑。孝慈勤儉。悉出性成。及笄歸先大人。比見先大人賦質清癯。弗能健飯。心忤忤懼。一飯一食。太孺人自爲之。假人手。慮弗潔也。蓋前母蔣太孺人事先大人。有舉案遺風。太孺人繼之。猶兢兢若

弗逮云。迨綜理家務。周策遠慮。不以累先大人。惟念先大人藉於嗣。庶母而下。爲置侍妾。太孺人仁慈逮下。相得甚歡。先大人得內助之力。從容頤養。眼看兒女成立。以耄壽終。然太孺人實未嘗一日安坐堂上也。先是先大人貳江西新城尹之任。留太孺人撫不孝象樞。家居守墳墓。門戶蕭然。外侮尋至。不孝象樞纔七齡耳。太孺人孤力撐持不勝。賴外祖縣尉公出死力保護之。門戶乃無恙。俾先大人薄宦四千里外。無內顧憂。且得以廉謹稱。太孺人始慰甚。自太孺人委禽後。先王父母旣逝。太孺人曰。吾爲魏家婦。未及事翁姑。盡孝養。凡瓜果菜羹。必肅獻主前。如問視禮。曰。此爲婦終身甘旨也。歲時伏臘。禮更加焉。年至七十。步履頗藉。始令代獻酒漿。猶手羈罔倦勤。又語不孝象樞曰。致祭家祠。必孝子賢婦。祖宗享之。親族有不敬父母者。勿令與祭。居常遇親眷男女。惟孝慈勤儉是誠。大義懷如。訓不孝象樞居官秉公。居鄉持正。勿激勿隨。俱未能仰副慈教。惟有自守而已。太孺人性尙樸素。不飾珠翠。衣至三澣。不敝不更。簪珥適用而止。絲絃歌唱。每深惡痛絕之。尤不喜告密。及談人短長。聽眷屬談井臼滫澠。則樂閒有戲謔。或言衣飾綺麗者。卽正色叱之曰。此等不願入吾耳。吾獨愛本色婦人。老實持家也。里中聞之。頗相尙焉。生平不肯暴殄天物。物無貴賤。皆手自積貯。不使散佚。人亦無敢妄冀侵漁。至蓄養僕婢。殊不厭煩。晨興先爲櫛髮。寒至卽爲著絛。有疥癬蟲蟻之類。太孺人手自篋洗擦治。了無厭惡意。且曰。吾子女垢面蓬頭。嚴冬慄慄侍吾側。心如割矣。若輩離父母。吾卽其父母也。甯二視哉。族黨有貧乏者。解衣推食。往往無德色。然亦不濫施予。人咸德之。無過望者。諗知勤儉家風。蓋如此。不肖象樞服官垣掖。順治八年遇覃恩。父贈徵仕郎。

刑科左給事中。前母贈孺人。母封太孺人。迨歸養後。於康熙三年領制軸。迎至里門。時太孺人病起扶杖。望闕叩頭祇受。卽不孝象樞。色養有所未盡。賴天寵隆渥。怡如也。詎意一疾不起耶。太孺人精明爽決。德量尤莫能及。死生之理。見之甚明。荒唐怪異。絕口不道。臥牀五十八日而永訣。兒女環侍。悉能識某某受遺命。且呼不孝象樞命之曰。吾年逾八袞。自返生平。死無憾矣。嗚呼慟哉。母氏劬勞。昊天罔極。不孝象樞身不能代。雖滴血和墨。安能寫太孺人慈德萬一哉。太孺人生於明萬歷十七年十月初六日寅時。卒於康熙八年六月十六日亥時。享年八十有一。子二。長象懸。庶母趙氏出。順治辛卯武舉。娶馬氏。武進士柳溝參將馬公如龍女。副室孫氏。次卽不孝象樞。太孺人出。順治丙戌進士。封徵仕郎。刑科左給事中。前內翰林國史院庶吉士。今任光祿寺寺丞。娶李氏。太學生李公經權女。封孺人。副室劉氏。女三。長適舉人張公紹芳。長男貢生韞溫。庶母趙氏出。次適舉人商河知縣曹公鑒。男署渾源州守備雲中。次適處士張公文範。次男太學生大猷。俱太孺人出。孫男三。長學誠。象樞出。聘舉人賈公時泰次女。次學讓。象懸出。次學謙。象樞出。俱幼。孫女四。長適庠生高公世樑。男庠生明德。象懸出。次適天城參將劉公中。沒男太學生候選縣丞天賜。象樞出。次適貢生周公之鼎。男廷錄。象懸出。次名端莊。幼。象樞出。不孝象樞抱恨終天。言無倫次。謹述大概。幸採而錄之。存沒均感。曷其有極。

張烈婦袁氏死節紀略

張烈婦者。蔚明經張旺妻袁氏也。明經因鄉闈。年甫壯。以拔貢官河南陽武丞。齋解閩餉七萬兩納軍前。

事竣。旋舟白下。歿。仲弟哈暨子一枝。奔赴扶柩抵任所。哀往哭。撫棺泣血。絕食誓同死。夜不及防。遂自經。時康熙四年九月十三日也。陽邑侯劉公臨喪。漬淚捐俸資棺殮。申達省會。諸上官已經表揚。博浪沙士民男女流涕罷市。薦紳先生率作詩歌以義之。既歸蔚里。人自紳士迄閭閻。無不墮淚者。蔚郡侯鄭公復申達請表揚。悉如豫省例。嗚呼。袁其死而不死乎。袁死明經。明經死王事。僉謂臣職婦道。兩無忝云。按明經性孤介。蚤失怙恃。肅家政。袁出望族。言笑不苟。共撫兩幼弟。俱成立。食庠餼。永不析箸。家貲以外無私蓄。每食同几。數十年如一日。兄若弟之友恭者。在蔚羅稱最。其內助賢且烈。復如此。明經刑于之化。可多得哉。先是宋烈女死。高其義者。類歌咏不能已已。茲彙集烈婦輓詩合刻一編。曰雙烈集。蓋風化第一事云。

